



Na osnovu člana 17 Statuta, Upravni odbor Fonda "Bošnjaci", na 25. redovnoj sjednici, održanoj 7.4.2016. godine, donosi

PRAVILNIK

o dodjeli stipendija učenicima i studentima u Bosni i Hercegovini

I. UVODNI DIO

Član 1.

Pravilnikom o dodjeli stipendija učenicima i studentima u Bosni i Hercegovini (u daljem tekstu: Pravilnik) utvrđuju se opće i posebne odredbe, uslovi, način i kriteriji za dodjelu stipendija, prava i obaveze stipendista kao i druga pitanja iz ove oblasti.

Član 2.

Stipendije se dodjeljuju na osnovu odluka Upravnog odbora Fonda "Bošnjaci".

Visinu i broj stipendija određuje Upravni odbor Fonda "Bošnjaci" (u daljem tekstu: Upravni odbor) za svaku školsku/akademsku godinu u skladu s raspoloživim finansijskim sredstvima, odnosno planom finansijskog poslovanja.

Član 3.

Upravni odbor donosi sljedeće odluke o dodjeli stipendija:

- 1) Odluku o dodjeli stipendija učenicima i studentima za koje finansijska sredstva obezbjeđuje Fond "Bošnjaci",
- 2) Odluku o dodjeli stipendija učenicima generacije Prve bošnjačke gimnazije i Gazi Husrevbegove medrese u Sarajevu kojom im se ne uslovljava pravo na izbor visokoškolske ustanove za nastavak školovanja,
- 3) Odluku o dodjeli stipendija studentima Fakulteta islamskih nauka u Sarajevu,
- 4) Odluku o dodjeli stipendija studentima za koje finansijska sredstva obezbjeđuje Bejtuzzekat iz Kuvajta, u skladu sa Sporazumom o saradnji, pravilima, uslovima i instrukcijama Bejtuzzekata iz Kuvajta i
- 5) Odluku o dodjeli i servisiranju stipendija drugih pravnih i fizičkih lica.

Član 4.

Pravo na stipendiju mogu ostvariti:

- 1) redovni studenti prvog i drugog ciklusa studija na javnim visokoškolskim ustanovama u Bosni i Hercegovini za koje finansijska sredstva obezbjeđuje Fond "Bošnjaci",
- 2) učenici Prve bošnjačke gimnazije u Sarajevu i medresa u Bosni i Hercegovini u skladu sa Pravilnikom i sistemom bodovanja kandidata za dodjelu stipendija za koje finansijska sredstva obezbjeđuje Fond "Bošnjaci",
- 3) redovni studenti prvog i drugog ciklusa studija na javnim visokoškolskim ustanovama u Bosni i Hercegovini za koje finansijska sredstva obezbjeđuje Bejtuzzekat iz Kuvajta.

Član 5.

Redovni studenti prvog i drugog ciklusa studija sa prosječnom ocjenom 10,00 ostvaruju pravo na stipendiju ukoliko ispunjavaju opće kriterije navedene u članu 9, stav 1, ovog Pravilnika.

Član 6.

Na osnovu odluka Upravnog odbora, Fond "Bošnjaci" će na svojoj internet stranici i u sredstvima javnog informiranja objaviti konkurse za dodjelu stipendija, i to:

- 1) Konkurs za dodjelu stipendija učenicima i studentima za koje finansijska sredstva obezbjeđuje Fond "Bošnjaci" i
- 2) Konkurs za dodjelu stipendija studentima za koje finansijska sredstva obezbjeđuje Bejtuzzekat iz Kuvajta.

Konkursi za dodjelu stipendija sadrže:

- 1) naziv i sjedište Fonda,
- 2) vrstu, broj i iznos stipendija,
- 3) uslove i kriterije za dodjelu stipendija,
- 4) potrebnu dokumentaciju na osnovu koje se vrši bodovanje kandidata,
- 5) vrijeme trajanja konkursa i
- 6) druge podatke o stipendijama.

Član 7.

Sastavni dio konkursa za dodjelu stipendija je sistem bodovanja kandidata i unificirani obrazac zahtjeva za dodjelu stipendija koji se, uz konkurs, objavljuju na internet stranici Fonda "Bošnjaci" i drugim sredstvima javnog informiranja.

Kandidat može aplicirati samo na jedan od objavljenih konkursa Fonda "Bošnjaci".

II. KRITERIJI I BODOVANJE KANDIDATA ZA DODJELU STIPENDIJA

Član 8.

Pravo na stipendiju mogu ostvariti učenici i studenti na osnovu kriterija utvrđenih ovim Pravilnikom.

Član 9.

Opći kriteriji za dodjelu stipendija:

- 1) da je kandidat državljanin Bosne i Hercegovine,
- 2) da ima prebivalište na teritoriji Bosne i Hercegovine,
- 3) da je redovan učenik jedne od škola iz člana 4., stav 1., alineja 2. ovog Pravilnika,
- 4) da je redovan student na jednoj od javnih visokoškolskih ustanova u Bosni i Hercegovini,
- 5) da nije i da neće biti korisnik stipendije, kredita ili drugog oblika novčane naknade koja ima obilježje stipendije od nekog drugog pravnog ili fizičkog lica,
- 6) da na dan objavljivanja javnog konkursa nije stariji od 19 odnosno 25 godina života,
- 7) da ispunjava uslove iz Vakufname ili Sporazuma o saradnji sa Bejtuzzekatom iz Kuvajta.

Posebni kriteriji za dodjelu stipendija:

- 1) postignuti rezultati u učenju i vladanju,
- 2) da je učenik odnosno student prve godine studija, u prethodnoj školskoj godini ostvario prosjek ocjena najmanje 4,50,
- 3) da je student prvog ciklusa studija, u prethodnoj akademskoj godini, ostvario prosjek ocjena najmanje 8,00 za stipendije iz sredstava Fonda "Bošnjaci",
- 4) da je student prve godine drugog ciklusa studija, u završnoj godini, ostvario prosjek ocjena najmanje 9,00 za stipendije iz sredstava Fonda "Bošnjaci",
- 5) da je student druge godine drugog ciklusa studija, u prethodnoj akademskoj godini, ostvario prosjek ocjena najmanje 9,00 za stipendije iz sredstava Fonda "Bošnjaci",

- 6) da je student na prvom ciklusu studija, u prethodnoj akademskoj godini, ostvario prosjek ocjena najmanje 7,50 za stipendije iz sredstava Bejtuzzekata iz Kuvajta,
- 7) da je student prve godine drugog ciklusa studija, u završnoj godini, ostvario prosjek ocjena najmanje 8,50 za stipendije iz sredstava Bejtuzzekata iz Kuvajta,
- 8) da je student druge godine drugog ciklusa studija, u prethodnoj akademskoj godini, ostvario prosjek ocjena najmanje 8,50 za stipendije iz sredstava Bejtuzzekata iz Kuvajta,
- 9) ostvareni posebni rezultati na kantonalnim, entitetskim, državnim ili međunarodnim takmičenjima iz predmeta matematika, fizika, informatika i strani jezici u prethodnoj školskoj/akademskoj godini u organizaciji ili posredstvom nadležnog ministarstva obrazovanja,
- 10) položeni hifz,
- 11) materijalno stanje i socijalni status porodice,
- 12) da niko od članova uže porodice nije korisnik stipendije Fonda "Bošnjaci".

Član 10.

Pravo na stipendiju ne mogu ostvariti:

- 1) studenti koji imaju status apsolventa,
- 2) studenti u radnom odnosu,
- 3) studenti likovnih, muzičkih, scenskih i dr. umjetnosti ukoliko apliciraju na stipendiju za koje finansijska sredstva obezbjeđuje Bejtuzzekat iz Kuvajta,
- 4) studenti koji su zasnovali bračnu zajednicu, a koji apliciraju za stipendije iz sredstava Bejtuzzekata iz Kuvajta.

Član 11.

Kao dokaze za ispunjavanje kriterija predviđenih članom 9. ovog Pravilnika, kandidati za dodjelu stipendija uz zahtjev prilažu sljedeću dokumentaciju:

- 1) uvjerenje o državljanstvu,
- 2) uvjerenje o stalnom mjestu prebivališta, izdato nakon objavljivanja konkursa,
- 3) uvjerenje o redovnom upisu u tekuću školsku/akademsku godinu,
- 4) pismenu izjavu da kandidat nije i da neće biti korisnik stipendije, kredita ili drugog oblika novčane naknade koja ima obilježje stipendije od nekog drugog pravnog ili fizičkog lica u tekućoj školskoj/akademskoj godini, ukoliko ostvari pravo na stipendiju Fonda "Bošnjaci",
- 5) pismenu izjavu kojom se daje saglasnost Fondu "Bošnjaci" za objavu ličnih podataka prilikom objave rang liste, odnosno rezultata konkursa i dr. na web stranici Fonda i drugim sredstvima javnog informiranja,
- 6) uvjerenje o položenim ispitima iz prethodne školske/akademske godine s izračunatim prosjekom ocjena na dvije decimale,
- 7) studenti prve godine studija prilažu ovjerenu fotokopiju svjedodžbe završnog razreda srednje škole kao i odgovarajući dokaz ukoliko su dobitnici priznanja Učenik ili Ponos generacije,
- 8) dokaz za osvojeno prvo, drugo ili treće mjesto na kantonalnom, regionalnom, entitetskom, državnom ili međunarodnom takmičenju iz predmeta matematika, fizika, informatika i strani jezici u prethodnoj školskoj/akademskoj godini u organizaciji ili posredstvom nadležnog ministarstva obrazovanja,
- 9) diplomu Rijasetu Islamske zajednice u Bosni i Hercegovini o položenom hifzu,
- 10) kućnu listu,
- 11) dokaze o ukupnim mjesečnim prihodima/primanjima za punoljetne članove porodičnog domaćinstva (izuzev onih koji imaju status redovnog učenika ili studenta) po osnovu: radnog odnosa, penzije, samostalne djelatnosti, boračko-invalidske zaštite i drugih osnova (za uposlene isključivo platna lista za posljednji mjesec, iz koje se vide stvarna primanja, za penzionere ček od penzije za posljednji mjesec, čekovi od IMO i LIMO, za nezaposlene članove domaćinstva uvjerenje Zavoda za zapošljavanje, a ukoliko se ne vode na Zavodu za

zapošljavanje dostaviti uvjerenje iz poslovnice PIO/MIO da se ne vodi kao osigurano lice po osnovu radnog odnosa ili ovjerena fotokopija zdravstvene knjižice iz koje se mogu vidjeti podaci o osiguranom licu, osnovu osiguranja i srodstvu sa osiguranikom, za članove domaćinstva mlađe od šest godina starosti izvod iz matične knjige rođenih);

- 12) dokaze da punoljetni članovi porodičnog domaćinstva (izuzev onih koji imaju status redovnog učenika ili studenta) imaju ili nemaju samostalnu privrednu djelatnost (uvjerenje Porezne uprave ili drugog nadležnog organa na osnovu kojeg se vidi da li se vode ili ne vode u registru poreznih obveznika kao poduzetnici, odnosno da li su ili nisu prijavljeni u jedinstveni sistem za registraciju, kontrolu i naplatu doprinosa kao obaveznici po bilo kom osnovu s iskazanim mjesečnim odnosno godišnjim prihodima);
- 13) dokaze za roditelje: dijete šehida, bez jednog ili oba roditelja (izvod iz matične knjige umrlih), dokaz o učešću u odbrambeno-oslobodilačkom ratu tokom oružane agresije na RBiH (najmanje 24 mjeseca), dokaz o invaliditetu roditelja (preko 60% odnosno 80%);
- 14) dokaz o ličnom invaliditetu kandidata za dodjelu stipendije (preko 60%);
- 15) dokaze o redovnom školovanju učenika odnosno studenata u porodici,
- 16) izjavu da nije zasnovao/la bračnu zajednicu ukoliko aplicira na stipendiju za koje finansijska sredstva obezbjeđuje Bejtuzzekat iz Kuvajta.

Član 12.

Dokazi o ispunjavanju uslova navedenih u članu 11. ovog Pravilnika moraju biti originalni ili ovjerene fotokopije koje nisu starije od šest mjeseci.

Član 13.

Kandidati za dodjelu stipendija iz člana 5. ovog Pravilnika dužni su uz zahtjev dostaviti dokumentaciju iz člana 11., stav 1, alineje 1, 2, 3, 4, 5 i 6.

Član 14.

Kandidati za dodjelu stipendija dužni su sami sebe izbodovati na zahtjevu za dodjelu stipendija, a njihovo bodovanje će provjeriti Komisija za utvrđivanje prijedloga kandidata za dodjelu stipendija.

Član 15.

Komisiju za utvrđivanje prijedloga kandidata za dodjelu stipendija (u daljem tekstu: Komisija) imenuje Upravni odbor Fonda "Bošnjaci" na period od četiri godine.

Član 16.

Komisija utvrđuje blagovremenost dostavljenih zahtjeva, kompletnost i validnost dokumentacije, ispunjavanje općih i posebnih uslova i kriterija, propisanih konkursima za dodjelu stipendija i ovim Pravilnikom, vrši provjeru samostalnog bodovanja kandidata i dr.

Tokom obrade podnesenih prijava komisija može od kandidata ili nadležnih organa zatražiti dodatna pojašnjenja.

Član 17.

Komisija utvrđuje sljedeću vrstu i broj bodova za svakog kandidata:

- 1) bodovi po osnovu postignutih rezultata u učenju, takmičenjima i položenom hifzu;
- 2) bodovi po osnovu prosječnih primanja po članu domaćinstva, socijalnog statusa kandidata i njegove porodice;
- 3) bodovi po osnovu broja učenika/studenata u porodici i
- 4) bodovi po osnovu dosadašnjeg korištenja stipendije u ovisnosti o stepenu izvršenja obaveza iz Ugovora o stipendiranju.

Član 18.

Iznos bodova kandidata za dodjelu stipendije je sljedeći:

- 1) bodovi po osnovu ostvarene prosječne ocjene u prethodnoj školskoj godini od 5 do 25 bodova
- 2) bodovi po osnovu ostvarene prosječne ocjene u prethodnoj akademskoj godini od 10 do 30 bodova
- 3) bodovi po osnovu ostvarenih rezultata na takmičenjima od 3 do 20 bodova
- 4) bodovi po osnovu položenog hifza 6 bodova
- 5) bodovi po osnovu prosječnih primanja po članu domaćinstva od 0 do 20 bodova
- 6) bodovi po osnovu materijalnog stanja i socijalnog statusa porodice od 3 do 16 bodova
- 7) bodovi po osnovu invaliditeta kandidata 6 bodova
- 8) bodovi po osnovu broja učenika/studenata u porodici od 2 do 6 bodova
- 9) bodovi po osnovu dosadašnjeg korištelja stipendije Fonda "Bošnjaci" od 2 do 6 bodova,
- 10) bodovi po osnovu dosadašnje korištenja stipendije Bejtuzzekata iz Kuvajta od 6 do 12 bodova,
- 11) kandidatima iz člana 5. Pravilnika dodjeljuje se maksimalan broj bodova.

Za studente prve godine studija prosjek ocjena se uzima iz završnog razreda srednje škole, a za učenike prvog razreda srednje škole iz završnog razreda osnovne škole.

Za studente prve godine drugog ciklusa studija prosjek ocjena se uzima iz završne godine prvog ciklusa studija.

Član 19.

U slučaju da dva ili više prijavljenih kandidata imaju isti broj bodova, prednost imaju:

- 1) kandidati sa većom prosječnom ocjenom,
- 2) kandidati na višim godinama studija,
- 3) dosadašnji stipendisti Fonda "Bošnjaci".

Član 20.

Komisija utvrđuje preliminarne rang-liste kandidata za dodjelu stipendija.

Član 21.

Preliminarne rang-liste se objavljuju na internet stranici Fonda "Bošnjaci", s ostavljenom mogućnošću žalbe Upravnom odboru u roku od 3 dana od dana objave rezultata.

Član 22.

Nakon provedenog žalbenog postupka Upravni odbor Fonda "Bošnjaci" donosi konačnu Odluku o dodjeli stipendija.

Konačne rang-liste kandidata za dodjelu stipendija se objavljuju na internet stranici Fonda "Bošnjaci".

Član 23.

Ukoliko kandidat odustane od stipendije Fonda "Bošnjaci", stipendija se dodjeljuje sljedećem kandidatu s rang-liste pod uslovom da isti u međuvremenu nije ostvario pravo na stipendiju, kredit ili drugi oblik novčane naknade koja ima obilježje stipendije.

Član 24.

Neblagovremene i nepotpune zahtjeve Komisija neće uzimati u razmatranje.

Dokumentacija kandidata ne podliježe vraćanju.

III. PRAVA I OBAVEZE KORISNIKA STIPENDIJA

Član 25.

S dobitnicima stipendije Fond "Bošnjaci" zaključuje ugovore o stipendiranju za tekuću školsku/akademsku godinu, kojima se reguliraju međusobna prava i obaveze.

Stipendije se dodjeljuju za jednu školsku/akademsku godinu i isplaćuju se u skladu s odlukom i ugovorom o stipendiranju.

Ugovor o stipendiranju potpisuju stipendista i direktor Fonda "Bošnjaci".

Član 26.

Svaka od ugovornih strana može jednostrano raskinuti ugovor o stipendiranju usljed povreda ugovornih odnosa.

Fond "Bošnjaci" će jednostrano raskinuti ugovor o stipendiranju ukoliko ustanovi:

- 1) da stipendista prima stipendiju, kredit ili drugi oblik novčane naknade koja ima obilježje stipendije od nekog drugog pravnog ili fizičkog lica,
- 2) da je stipendista ostvario pravo na stipendiju na bazi netačnih odnosno neistinitih podataka,
- 3) da je napustio redovno školovanje ili izgubio pravo na njega,
- 4) da se bez opravdanog razloga ne odaziva na pozive za učešće u realizaciji planiranih aktivnosti Fonda "Bošnjaci".

Član 27.

Stipendisti su dužni u cijelosti vratiti primljene stipendije u slučaju jednostranog raskida ugovora o stipendiranju od strane Fonda "Bošnjaci", uz trajno gubljenje prava na stipendiju Fonda "Bošnjaci".

Član 28.

Ukoliko stipendista, za koje finansijska sredstva obezbjeđuje Bejtuzzekat iz Kuvajta, izgubi status stipendiste, trajno gubi pravo na ovu vrstu stipendije.

Član 29.

Stipendista se obavezuje da će nakon okončanja školovanja i zasnivanja radnog odnosa raditi na afirmaciji i unapređenju Fonda "Bošnjaci", finansijski ga pomagati u skladu sa svojim mogućnostima i doprinositi njegovom trajnom opstanku i kontinuiranom stipendiranju generacija koje dolaze.

IV. ZAVRŠNE ODREDBE

Član 30.

Ovaj Pravilnik stupa na snagu danom donošenja i bit će objavljen na internet stranici Fonda "Bošnjaci".

Broj: 01-123/16

Sarajevo: 07. 04. 2016. godine



PREDSJEDNIK UPRAVNOG ODBORA
Muharem Hasanbegović